

摘藻堂四庫全書薈要

史部

欽定四庫全書薈要卷七千八百四十五

史部

大清世宗敬天昌運建中表正文武英明寬仁信毅大孝
至誠憲皇帝聖訓卷十三

用人

康熙六十一年壬寅十一月庚戌

上諭大學士等朕惟敷政之道用人為先闢門籲俊之典
由來尚矣然知人則哲自古為難朕在藩邸不與朝臣
往來所以內外大小官吏皆不能晰知今荷

皇考大行皇帝命承大統臨御之初簡用人材爾諸大臣
皆久蒙

皇考知遇任以股肱茲值

梓宮在上靈爽式憑爾等哀感交迫之時益當各竭忠盡
仰報高深內而大臣以及閒曹外而督撫以及州縣或
品行端方或操守清廉或才具敏練者爾等各據真知
灼見從公具摺密奏古人云內舉不避親外舉不避讎
爾等果矢公忠以人報國或素日同僚共事或同鄉同

年或門生親戚子弟俱准保奏勿避嫌疑勿徇私援黨
勿沽名市恩勿輕聽風聞勿言過其實有一於此則上
負

皇考任用之恩又負朕諮詢之意矣

皇考遺命囑朕篤愛懿親保全臣下數十年來聖明之世
本不容有姦貪昭著之人朕所需者人材但當有舉無
劾毋得修怨陷害爾等具摺或滿字或漢字各須親寫
不可假手於子弟詞但達意不在文理字畫之工拙其

有不能書寫者即行面奏至於政事中有應行應革能裨益國計民生者果能深知利弊亦著各行密奏朕自即位以來用人行政若有闕失亦宜直言勿隱朕之諄切詢問者一則急欲得人以資治理二則欲知朕行事之當否三則觀爾等所舉之人及所奏之事便可知爾等之居心制行矣

雍正元年癸卯二月丙寅

上諭六部尚書侍郎等各部屬員既各分司則各有職守

彼此不得干預況每司滿漢共有六員不可謂辦事無人若皆闕冗貪庸何難指名題叅另易其人安用他司越俎代庖乎此明係鑽營包攬為漁獵之計嗣後不論何司不論滿漢永遠不得借才能之名一人兼攝數司之事若有緊要事件暫時派出指辦一二事尚可

三月乙酉

上諭吏部各省督撫衙門事繁非一手一足所能辦勢必延請幕賓相助其來久矣但幕賓賢否不等每有不肖

之徒勾通內外肆行作弊黜陟屬員則清濁混淆申理
獄訟則曲直倒置敗督撫之清節誤督撫之功名彼則
置身事外飽橐而去殊屬可恨夫今之幕客即古之參
謀記室凡節度觀察等使赴任之時皆徵辟幕僚功績
果著即拜表薦引彼愛惜功名自不敢任意苟且嗣後
督撫所延幕客須擇歷練老成深信不疑之人將姓名
具題如効力有年果稱厥職行文咨部議敘授之職位
以示砥礪該部詳議具奏

四月甲子

上諭直隸各省督撫國家敦勵風俗首重賢良舉髦士以
勸秀民實為政教之大端凡封疆大吏宜共體此意廣
詢博訪不可視為具文漫不加察也前所頒恩詔內有
每府州縣衛各舉孝廉方正暫賜以六品頂帶榮身以
備召用一條距今數月未有疏聞豈通都大邑之中海
濱山陬之遠遂無潛修砥操克稱俊乂可應詔旨者歟
誠恐有司怠於採訪雖有端方之品無由上達殊負朕

殷殷延攬之至意特著直省各督撫速遵前詔確訪所屬果有行誼篤實素為鄉黨所推者即列名具奏毋得隱蔽及濫引塞責

十月辛亥

上諭總理事務王大臣等部院筆帖式食俸僅二十八兩不及一護軍領催之錢糧而伊等樂於供職者冀有陞轉之途也伊等既有陞轉之途若概與加俸恐伊等不知鼓勵轉不竭力嗣後各部院筆帖式著各堂官及該

管之人將伊等內謹慎無過又或辦事勤敏或寫本精工或善於繙稿者於年終分別保奏此保奏之人如何照伊等品級增添俸銀或另行加恩之處朕再降旨

乙丑

上諭大學士等國家建官分職於翰林之選尤為慎重必人品端方學問醇粹始為無忝厥職所以培館閣之材儲公輔之器也從前

聖祖加意育才循循訓導又纂修各種書籍需員甚多故

翰林院編檢幾至二百人庶吉士亦五六十人朕臨御之初未有編纂諸事又未能如

聖祖之善於訓導誠恐人才置之閒散特多方錄用內而科道吏部外而道府州縣俱各隨材器使務令疏通今編檢尚有百餘人庶吉士尚有數十人著內閣大學士會同翰林院掌院教習秉公別擇其學問優長字畫端楷或精於繙譯國書者留本衙門辦事及派各館纂修其或才具練達可當科道吏部之選或長於吏治編檢

可為道府庶吉士可為州縣者一一分別具奏至或老
病衰廢願自解退者聽其以原官休致其有行止不端
事蹟確實者奏聞革退今朕特恩開科人材輩出將來
揀選庶常朕當親加考試引見揀選至日後散館仍照
舊例以三等分用目今正屆殿試之期朕深知向有擬
送策聯鑽營甲第等弊殊可痛恨朕所點閱卷大臣俱
係平日實心委任之人各宜虛公謹慎杜絕諸弊倘有
仍蹈前轍者必嚴加處分務使文治日隆英才蔚起以

副朕籲俊興賢之至意

十二月辛亥

上諭八旗都統等向者每甲喇止設叅領一員因不敷用始委署一員協理昨議政大臣奏稱護軍校驍騎校等官以之委署叅領職卑不勝其任應停其委署等語朕加以酌量將委署叅領改作副叅領秩為五品嗣後副叅領員缺仍將護軍校驍騎校等官一併揀選引見補用若叅領副叅領奉有差遣其員缺應行委署者奏聞

委署如此則責任專而管轄得力由兵丁出身者其陞轉之途亦不致壅滯旗下既得人材辦理事務亦大有裨益至現在委署叅領應分別優劣優者授為副叅領劣者令其各回原職

雍正二年甲辰三月庚辰

上諭吏部兵部朕命各省督撫提鎮將所知官員保題特以要缺須得人辦理耳若其人著有勞績陞任別省者概不肯令赴陞任仍復題留本省殊未允協夫天下一

體豈得各分爾我嗣後如係水師營緊要員缺仍許題請外餘俱不許題留

八月己丑

上諭吏部國家分理庶績務在得人道府州縣等官尤屬要職其有才幹素著廉潔自持者倘不得以時上聞何以示勸著於各省道府同知通判州縣等官內總督保奏三員巡撫保奏二員布政使按察使各保奏一員將軍提督亦屬本省大員將所知者亦令保奏一員俱各

密封保奏不得會同商酌此保奏內不必將朕特用之員塞責朕特用人員有才守兼優者不拘人數亦另摺奏聞俟朕降旨調取之時再令來京引見如保奏不當日後劣蹟敗露將保奏上司一併治罪

雍正三年乙巳三月甲寅

上諭吏部月選道府州縣等官於地方民生最為切近與其甄別於既仕之後不若詳慎於未仕之前是以我皇考特重其事每於月官銓選之後令九卿詹事科道驗

看凡有出身不正素行不端之人各將所知據實陳奏而九卿等每多瞻徇莫肯抒誠及朕臨御以來屢降明諭務令直陳無隱乃仍循舊習瞻顧懷私係同鄉則畏避嫌怨係別籍又謂不能確知如此殊非慎選官方之道也嗣後月官掣缺之後九卿照例驗看但九卿人少不能周知並令各部院衙門堂司官將所知漢人內有出身不正行止不端者各具密摺於月官考履歷之日至乾清門進呈其有品行素優者亦令密奏若係旗員

則令本佐領叅領都統副都統亦照此例各具密摺奏
聞倘有挾讎誣奏者朕叅閱衆論自能洞悉諸臣亦斷
不能欺朕也如此則不肖倖進之徒皆知儆畏名器不
致濫邀矣

六月庚寅

上諭 部外任官員迴避本族例俱赴京另補朕思督撫
兩司及統轄全省之道員其族人迴避者自應赴京另
補若分巡數府之道員及知府同知通判知州等官所

轄之地無幾其屬員職分卑微若必一例赴京另補未免往返稽延艱難拮据深可軫念嗣後遇此等應行迴避之員著該督撫即於本省內調補如此則屬員既遵本族迴避之例而又無另補守候之苦於公私均為有益
部即遵諭行

十月己巳

上諭果郡王允禮順承郡王錫保八旗漢軍內有平居孝友守分讀書之人考試既不獲中式而又不能別就者

爾二人查明分別挑選其上三旗包衣旗鼓佐領下人
令內務府總管保奏其王等包衣旗鼓佐領下人令各
該王保舉如此則人不致於壅滯而亦可得才能之選
矣

雍正四年丙午六月丙寅

上諭吏部三年舉行大計所以激濁揚清整飭吏治必舉
劾之間至公至當方足以昭勸懲之典查定例卓異人
員俱送京引見而叅劾人員則聽候部院議奏不行引

見此中或有冤抑及避重就輕等弊亦未可定嗣後大計之年除貪酷之員既已指明劣蹟叅奏無庸再行引見外其餘叅劾等官該部照例處分出缺其應作何送京引見之處九卿詳議具奏

己丑

上諭諸王大臣等從古帝王之治天下皆言理財用人朕思用人之關係更在理財之上果任用得人又何患財之不理事之不辦乎朕即位以來推心置腹以待爾等

大臣時時諮訪務得人才共襄庶政爾大臣等亦各有
所保薦以備任用朕深嘉之但知人自古為難而保人
更非易事知人者不過知其才具豈能知其存心保人
者亦祇能保其目前豈能保其異日是以朕曲加體諒
從不苛求但公私二字所關甚重不可以不辨而公中
有私私中有公尤不可不時時警省也即如始初見其
人善而舉之既舉之後其人改操易轍即當據實奏聞
倘以為從前既舉而自護其短為之掩飾彌縫此則公

中之私也或始初因朋友故舊之情而舉之既舉之後
時時警戒提撕相責以善一聞其聲名不好或即行檢
舉或密奏以聞此則私中之公也爾諸大臣每一人所
舉多者不過二三十人平時訪察其行為勸勉其廉謹
或有居官不善即行叅奏不稍回護如此則人人有所
忌憚爭自濯磨國家可收得人之益爾等亦不愧以人
事君之義矣又如爾等大臣各有子弟居官為父兄者
同列於朝情關朋友豈不望其有成然與其私受囑託

庇護朋友之子弟使子弟有所恃而不肯努力上進何如切加教導使其儆惕王之於成若大臣子弟既有父兄之訓迪又有堂官之督率則成人者必多國家豈不甚樂有世家大族之子孫而用之哉總之朕之優待爾大臣與其遷官賞賚不若成就爾之名節為一不朽之人爾等之於朋友及薦舉之人與其結以私恩小惠護其過愆而喪其人品何如以大義相規使之為端人良吏永保令名至於家庭之間訓導子弟又不待言矣勉

之戒之

七月丁酉

上諭吏部道府等官有表率屬員之責必得賢能諳練之員方於地方事務不致貽誤朕慎重官方雖州縣等官皆審酌補用而於道府尤為加意非審知其人材識足以勝任者不輕試用捐例候選人員初任者多於地方事務從未經歷一旦畀以道府驟膺民社未必遽能稱職及至不稱職時督撫糾叅反受黜革情亦可憫嗣後

凡係捐例候選道府人員俱著補授各部郎中令其學習辦事至應陞道府時令各該堂官保送引見

己亥

上諭吏部朕從前曾下諭旨各省道府州縣之居官好者命總督保舉三人巡撫保舉二人提督布政按察二司各保舉一人密封具奏不得互相商議原以通省人才不少保舉多者不過二三人少者僅一人諸臣於所素知者各拔其尤自然精確督撫提督布按二司皆朝廷

大吏受國家深恩自應體朕為天下得人之意不徇私情秉公薦舉乃其中竟有挾私妄舉者及來京引見俱極庸陋殊非人臣以人事君之義今各員俱已引見爾部可再行文與各省督撫布按二司除從前曾經密舉及朕特旨補授各員外督撫暨布按二司各於道府州縣中明舉一人不得雷同督撫自行題奏布按二司咨呈爾部文到日爾部即繕摺具奏被舉之州縣官員並令給咨來京引見保舉之道府官員不必來京如有挾

私任情草率濫舉者朕必從重治罪斷不姑容

雍正五年丁未二月乙亥

上諭河南巡撫田文鏡據奏請將候選州縣分撥各省學習以裨吏治此議朕於踐阼之初業經思及因難以施行遂寢而未發蓋自古迄今大抵中材居多欲求出類拔萃之賢世不屢覲故理國之道貴儲才有素首先以厚風俗為要務風俗既端斯趨向有方而人材蔚起不特科甲輩學古入官即一切旗漢人員宜無不講求經

濟吏治民生豈盡茫然莫喻但恐其居心不肯恪秉公忠以奉乃職耳若慮以民社為新進後生所嘗試之具粵稽舜典明試以功車服以庸已啟後世科資循格之端是以地方外吏全賴守封疆者激揚公正糾舉精明正所謂三載考績黜陟幽明也至云新選者少則數月多則經年安保其無害於民今學習之員不令攝事無由覈驗優劣委令署理彼僉邪小人之為害於民又獨不然乎況督撫諸臣雖簡命自朕未必一皆公爾忘私

或稍涉夤緣則大啟奔競其弊有不可勝言者不寧惟是即朕現今用人之法亦止堪暫行一時將來自仍歸於

聖祖疇昔銓衡之成憲朕緣目擊官常懈弛吏治因循不得不大示鼓勵以振作羣工委靡之氣俟咸知奮勉治行改觀時朕另有裁處又據奏朕超擢教職為州選舉生員為縣雜職亦准卓異試觀如是甄拔才堪入彀者能得幾人此亦出於偶爾旁求非可永遠循行之良策

所以吏兵兩部向年舊例悉仍舊貫未命更張一二間
遇督撫越例題請補授亦俱令聲明原委朕降特旨允
行蓋有深意存焉豈俾輕紊成憲而致一代典章混淆
無序哉

三月丁未

上諭吏部會試舉人著爾部揀選引見併問九卿將所知
者舉出再舉人內有伊等同鄉素日推服之人亦著舉
人公舉或數人共舉一人或十數人共舉一人俱將姓

名註明務須有猷有為有守之人方可推薦不得冒濫
閏三月乙丑吏部遵

旨會同九卿揀選下第舉人引

見分發各直省以州縣委署試用

上諭曰守令乃親民之官關係百姓之休戚故得其人則
民生被澤而風俗日淳不得其人則民生受累而風俗
日薄自古安民必先察吏此不易之經也朕御極以來
夙夜孜孜欲使薄海之內無一夫不獲其所而此願一

時難遂者則以縣令之不能盡得其人也果能得有猷
有為有守之人布散各省分膺民社之寄彼一人之精
神力量足以貫注乎一邑凡督撫大吏耳目心思之所
不能徧及者縣令皆能體察經理之則民生安得不厚
風俗安得不淳而朕心無一夫不獲之願於是乎可遂
矣向來各省縣令多循資按次照例選用之員故其中
庸碌無能者有之年力衰憊者有之少不更事者有之
以致苟且因循貪位竊祿諸事闕冗職掌廢弛此等之

人尚不能顧一身之考成豈能為地方之憑藉乎今因會試後天下舉子齊集京師朕思其中必有才品兼優之士是以特加遴選畀以縣令之任朕之所望於爾等者不僅在於辦理刑名徵收賦稅了簿書期會之責而已必須實盡父母斯民之道視衆庶為一體剛柔相濟教養兼施化澆薄而為醇良懲僉邪以安善類古稱愛民如子此語最宜體會父母愛子之心未有不教之以正者縣令果視民如子豈有優柔貽害姑息養姦行婦

人之仁忘聖賢之義而可謂之恫癘保赤者乎書經曰罔違道以干百姓之譽自古聖賢為治皆尚實政最惡虛名若時存沽名市惠之心必至為同流合污之鄉愿又何能為整綱飭紀之良吏乎從來父子之間施者不以為恩受者並忘其感守令之於民果能潛移默化使閭閻習為固然而泯其感頌之迹斯不愧父母之稱而媲美古之循良矣紳士居鄉倘有違理肆行之處令有司約束勸導之者無非欲其同歸於善並非令地方官

有意摧折之也爾等蒞任後於紳士之品行端方者則當加意敬禮以樹四民之坊表其小有過愆者則勸戒之令其悛改其不可覺悟不可寬宥者則置之於法以警其餘如此則賞罰公明輿情悅服而觀感興起比戶可封矣爾等身叨鄉薦皆以古之孝廉相比擬何以克副此孝廉二字且現經下第選期尚遠朕破格遴選授以官職即論感恩圖報之常情亦當人人自奮況朕心實仗爾等為朕教養斯民移風易俗以成一道同風之

盛爾等豈可薄待其身而為陋習所漸染私欲所牽制乎爾等果能卓然自立不負選用朕自格外加恩倘拜命之初一時感激而泣官以後頓改初心則不但國典王章無可寬貸即清夜靜思亦應無地自容矣勉之勉之

四月癸巳

上諭內閣從來為政在乎得人書曰野無遺賢萬邦咸寧蓋賢才登進在位者多則分猷効職庶績自能就理而

民生無不被其澤也朕即位以來加意旁求凡所以延訪擢用之道無不備至如現任官員及候補候選科目諸人每特令薦舉遴選引見廣開錄用之途冀收羣策之力又念各省學校原以養育人材命學臣保舉賢能升聞於朝以備任使乃直省學臣所舉人數不多又或草率塞責不能副得人之實夫十室之邑必有忠信古者取人之法惟鄉舉里選合於三代之制今直省府州縣學貢生生員多者數百人少亦不下百餘人其中豈

無行誼醇篤好修自愛明達之士乎著州縣官會同該學教官將貢生生員內居家孝友行已端方才可辦事而文亦可觀者秉公確查一學各舉一人於今年冬底申報該上司奏聞請旨或實無可舉者出具印結該督撫查實奏聞朕因廣攬人材舉此曠典所以黜浮華而資實用州縣教職為一方師長選賢薦能乃其專責倘敢虛應故事濫舉非人照溺職例革職或徇情受賄則當重治其罪八旗之滿洲蒙古漢軍亦照此例將人品

端方通曉漢文者著該佐領各舉一人如不得其人亦具印結令該都統彙齊奏聞請旨庶使潛修篤行之士得以表見而國家亦收得人之效矣

五月庚辰

上諭直省司道知府等朕惟治道之要莫大於用人督撫經理地方必任用司道知府猶朕統御天下必任用在廷諸大臣如廷臣不能實心任事則庶務之繁朕豈能以一人獨理如司道府不能實心任事則屬員之賢否

民生之利弊督撫豈能徧悉而周知用人之關於治道誠至重矣第人之才具不同心術各異用之有甚難者彼司道府等官有一等姦巧之人督撫有所委託稍涉繁難謂非分內所應辦即逡巡退縮似此懷姦詭避而反沽不阿諛上司之名此人之不能為督撫用者也有
一種好事之人不安本分惟所欲為如遇無能之督撫則事無大小任其簸弄督撫為所把持而不能自主如遇有為之督撫則巧窺意旨百計投合督撫不覺入其

穀中一任逞其私智此又督撫之用非其人者也顧為
督撫者勢不能不於所屬之司道府寄耳目委腹心必
將遴選其能任事者而委任焉人見其於稠人之中專
任一二人則指為鑽營奔競甚至媒孽其短以為怙勢
作威攬權納賄必致損敗督撫之聲名此等皆非公恕
之論也且其人既為督撫所信任自當不取悅於同官
不徇庇乎下屬銳意孤行無所顧惜其心有何攬權怙
勢之可言哉論者不察其心從而媒孽之抑何不恕之

甚乎朕以為人之行事所辨在公私是非之間而已向
令此一二專任之司道府官果能秉公持正實心辦理
地方之事不特督撫資其贊助朕亦且嘉賴焉要之用
人有專任一二人者亦事勢有所不得已焉耳設使各
省司道府等官皆殫其宣力分猷之實則督撫何樂而
不多用也亦猶在廷諸大臣人人公忠體國則皆朕之
股肱心膂朕求之而不可得者又何取乎一二人之專
任哉但知人則哲惟帝其難之彼為督撫者因屬員中

不能盡得其人而用之乃不得已而以耳目腹心專付之於一二人或有擇之不精用之不慎所託非人稍有所覺即當警省改悔不可袒護飾非則無過矣朕實深悉直省督撫用人之委曲復洞鑒直省司道府各官種種情偽為此諄切曉諭俾各警惕猛省直省督撫務須仰體朕意將屬員時加體察勿為宵小欺蒙朕自有遠照斷不使若輩少有遁情夫天下上智下愚之人無幾惟中材可與為善可與為不善者居多尚其敬聽朕訓

共勉為秉公持正實心辦事之人下不愧州縣之表率
上以不負督撫任用者不負朝廷則吏治烝烝日上措
天下於郅隆不亦美與

九月乙丑

上諭吏部凡縣令改授教職者因其不勝牧民之任例當
罷斥朕念其讀書攻苦選授一官不忍遽令廢棄是以
俾居師儒之席以展其所學此朕格外之恩也況教官
有化導士子之責較理民之任關係尤重應當殫心竭

力以盡職守倘因改授之故志氣隳頽奉職怠忽著各省巡撫學政查叅議處

十一月乙卯

上諭吏部定例凡在京各部院官員因病告假回籍調理者病痊之日仍以原衙門補用至在外各官一經告病即令休致所以防不肖有司之託病規避也夫外官有地方之責患病不能辦事自應呈請離任但病痊之日格於成例雖有才具優長之員不得起用殊為可惜從

前有府縣官員告病者朕降旨調來引見見其才尚可用即命醫調治痊可仍行補用誠以人才難得雖片長薄技不忍棄置也嗣後外官告病者著督撫查明確實具題令其回籍調治痊可有情願起用者於本籍起文赴部引見仍以原缺補用如此則可以杜規避之端而人才亦不至於淪棄矣

十二月丁亥

上諭大學士九卿等為治之道首重得人朕臨御以來夙

夜孜孜廣為諮訪期得人材以理庶政而內外臣工所保舉之員其中秉公推薦足備任使者固不乏人而徇私濫舉及苟且塞責者亦復不少朕思薦舉人材關係國家辨才論官之要道舉得其人則政事無不就理舉非其人則弊從此而生孟子曰立賢無方孔子曰舉爾所知觀聖賢之言則知得人之道宜廣其途以為搜羅而各舉所知庶可以收克知灼見之益也今特諭內外諸臣等京官自翰林科道郎中以上外官自知府道員

學政以上武官自副將以上旗員自叅領以上皆令各舉一人滿洲官員則保舉滿洲漢軍官員則保舉漢軍漢人官員則保舉漢人文職官員許保武職武職官員許保文職於滿漢文武內或係現任職官或係候補候選之人或係進士舉人貢監生員或係山林隱逸務期有猷有為有守品行才具足備國家之用者各人密封奏摺赴奏事人員處轉奏外官則遣家人齎送密摺來京付奏事人呈進即或親戚子姪等亦可據實薦奏不

必以嫌疑引避但京官如尚書侍郎外官如督撫提鎮
兩司皆係朕已經深知簡任者不必入所薦之列其奏
摺內只開列本人官銜姓名註明所薦之人官銜考語
不必引頌聖繁文此朕旁求俊乂之苦心冀賢才輩出
師濟盈廷俾百職得宜庶務畢舉凡有保舉之責者不
得瞻顧私交不得受人囑託不得互相商議不得輕聽
風聞夫十室之邑必有忠信凡人生平豈無一人熟識
深知者況既列朝紳受國家之爵祿而朕又推心置腹

畀以舉賢薦能之美事倘猶有懷藏私意濫舉非人者
清夜捫心尚可以為人乎且朕之觀人往往洞見隱微
將來觀所舉之人即可知舉人者心術之公私識見之
明昧亦不使諸臣得以行其私也

雍正六年戊申四月丁未

上諭內閣凡辦理府州縣事務若得曾經出仕諳練之人
於地方實有裨益朕愛惜人才於罷斥之員常降旨調
來引見以觀其才具之優劣不忍令其棄置今思從前

因公墨誤之員其中未必無才守可觀者著吏部行文各省凡知府同知通判知州知縣任內除大計特疏糾叅外其因公墨誤降革者該員曾經居官五年而離任之後交代清楚無錢糧案件未清之處准本人親赴吏部具呈吏部不拘人數即行奏聞考試履歷帶領引見候朕酌量起用起用之後若有貪婪不法再經叅出必嚴加治罪倘係平庸無能或行止不端之人妄自陳請希圖僥倖者亦難逃朕之鑒察

七月庚申

上諭內閣向來督撫赴任之時有奏請將平日所知人員帶往以備委用者朕因督撫事務甚繁欲得素所熟悉之人以收臂指之效事屬可行是以允從所請令其帶往酌量題補近聞督撫等帶往人員在地方不甚相宜或羣相趨奉而指為上司之腹心或妄生議論而以為上官之偏袒其中弊端日生以致流言不少如楊文乾請帶王士俊殷邦翰前往廣東楊文乾信用之廣東闔

省人心不服陳時夏請帶蔡益仁往蘇而江南之人指
為陳時夏之耳目莽鵠立請帶朱亨衍李敏德傅樹崇
往陝西原為備辦軍需乃不令効力一事藩司孔毓璞
即逢迎巡撫以一人委署二缺而命往試用之員不行
委署此皆帶往人員不宜於地方者朕思所帶之二三
人其得力有限而沮衆人効力之心則為益少而無益
多況屬員之微愆小過上司本應曲體保全而既為督
撫帶往親信之人理當畏避嫌疑有不便格外保全之

勢亦非所以愛惜人才也且督撫等果公正精明善於察吏則闔屬中豈無有廉幹之員可相信以心相資為理者何必於帶往之一二人是賴而啟衆口之疑議乎文官與武職不同武職以弓馬技勇為主有操練兵丁差委巡緝之事督撫提鎮等將熟悉之人奏請帶往以供使令可以得其効用之益至於文員則不應帶往從前督撫等之奏請甚非朕亦不當允從其請除督撫已經到任之後因本地要缺奉旨題補而本地不得其人

將別省舊屬題補者不必解任外如楊文乾陳時夏莽鵠立及各省督撫大吏從前所請帶往之人目今現在屬下者俱著回京請旨另用

十月癸未鑲黃旗蒙古副都統宗室滿珠錫禮條奏京營叅將以下千總以上等員應叅用滿洲不宜專用漢人

上諭曰從來為治之道在開誠布公遐邇一體若因滿漢存分別之見則是有意猜疑互相漠視豈可以為治乎

天之生人滿漢一理其才質不齊有善有不善者乃人情之常用人惟當辨其可否不當論其為滿為漢也自我

太祖高皇帝開國之初即滿漢兼用是以規模宏遠中外歸心蓋漢人中固有不可用之人而可用者亦多如三藩變亂之際漢人中能奮勇効力以及捐軀殉節者正不乏人豈可謂漢人不當用乎滿洲中固有可用之人而不可用者亦多如貪贓壞法罔上營私之輩豈可因

其為滿洲而用之乎且滿洲人數本少今祇將中外緊要之缺補用已足辦理若叅將以下之員弁悉將滿洲補用則人數不敷勢必有員缺而無補授之人朕屢諭在廷諸臣當一德一心和衷共濟勿各存私見而分彼此在滿洲當禮重漢人勿有意以相遠始為存至公無我之心去黨同伐異之習蓋天下之人有不必強同者五方風氣不齊習尚因之有異如滿洲長於騎射漢人長於文章西北之人果決有餘東南之人穎慧較勝非

惟不必強同實可以相濟為理者也至若言語嗜好服食起居從俗從宜各得其適此則天下之大各省不同而一省之中各府州縣亦有不同豈但滿漢有異乎朕臨御以來以四海為一家萬物為一體於用人之際必期有裨於國計民生故凡秉公持正實心辦事者雖疎遠之人而必用有徇私利已壞法亂政者雖親近之人而必黜總無分別滿漢之見惟知天下為公凡中外諸臣皆宜深體朕懷同寅協恭股肱手足交相為濟則國

家深有倚賴久安長治之道必由於此也

庚子

上諭吏部國家政務必得其人而後理朕加意旁求多方
遴選惟期庶司百職俊乂在官以收得人之效但各職
需人之處甚多該督撫等又屢屢奏請而現在赴部銓
選之員不敷揀用因思自古人臣為國有以人事君之
義孔子論舉賢才之道亦云舉爾所知可見凡人平生
必有深知篤信之才足備朝廷任使者果其以公忠為

心自無薦舉不得其實之理也茲特降諭旨著京官大學士以下主事以上之漢軍漢人外官督撫以下知縣以上之滿洲漢軍漢人每員各舉一人除現任知縣以上官員不必保舉外或係舉貢生監或係山林隱逸果有品行才猷可備任使者即親戚子弟亦不必引避嫌疑據實保舉至外官所轄之現任佐貳雜職等屬員亦准其保薦朕從政務需人起見開誠布公以期集思廣益內外大小臣工等共受國恩時懷報効自應秉公據

實以展臣子之心必無有徇私冒濫以自蹈欺罔者倘或舉非其人將來覺察或試用不稱責有攸歸勉之勉之

雍正七年己酉四月壬辰

上諭內閣外任督撫藩臬為全省之表率關係甚重每當簡用之時常以一時不得其人深勞念慮凡內外大臣受國家厚恩均當留意於平時秉公奏薦盡以人事君之道京官自學士侍郎以上外官自藩臬以上著各人

密保一人將其人可勝督撫之任或可勝藩臬之任據實奏明不必拘定滿漢亦不限定資格即府縣等員官階尚遠者果有真知灼見信其可任封疆大僚亦准列於薦牘之內若一時無深知可舉之人准其從容採訪不得草率塞責有負諮詢

閏七月丙申

上諭吏部凡遠省烟瘴地方文武官員之缺例將本省熟悉風土之人調補朕思烟瘴地方大半係邊遠簡僻之

缺若概行調補不令陞補未免強幹之員轉駐簡僻之所止圖挨俸無所表見而才具可用有志上進之人或生苟且因循之念亦未可定嗣後凡遇烟瘴地方文武官員缺出向例調補者著該撫提鎮等於屬員內秉公酌量若有可以題陞之員即具題請旨陞授若係應調之員仍照舊調補陞調兼行不拘一格總期人地相宜材職相當以副朕鼓舞裁成之至意倘有應行調補之人不願前往而該管上司聽其規避者或有不應題陞

之人而該管上司徇情題陞者經朕察出定行從重議處

雍正八年庚戌二月乙巳

上諭吏部為政之道務在得人朕加意旁求惟期賢才奮庸布列庶位百職修舉嘉惠民生凡所以遴選而登進之者亦多方矣雍正六年十月間以各處需員甚多而赴部銓選之人不敷揀用特降諭旨令京官大學士以下主事以上外官督撫以下知縣以上每人各舉一人

送部引見今行之既已年餘而內外官員未經舉報者

尚多則其平日必無深知灼見之人倘復展轉遲延必致人萌奔競之心而滋夤緣請託之弊所當酌量變通者也現今會試中額廣至四百名其中必有可供任使之人而直省選拔貢生陸續來京亦可教導而成就之以備庶官之用著將各保一人之例停止若有已經到部者仍准其引見該部即行文在京各衙門并直省地方知之

三月己巳

上諭內閣朕愛惜人材不忍聽其限於考成遂至放廢而
外任各官案件繁多往往罹於叅罰是以數年來因公
註誤之員例應降革者多於覆本之內降旨令該上司
出具考語送部引見若其才具稍有可用必再試以職
任而成全之雖片善寸長亦不肯輕棄也今思在京部
院司官及旗員等雖叅罰之案不多然亦有因公註誤
者所當一體加恩與以贖過自新之路嗣後在京文武

各官有因公誑誤至於降革而任內無錢糧不清及治罪之案者准照外員之例令該堂官該旗大臣出具考語奏聞帶領引見或將該員仍留原任或另行試用或照例降革候朕降旨裁奪

十月己酉

上諭內閣辦理軍需必得熟練之員方為有益陝甘二省州縣官員備辦軍需有經手數年者有經手一二年者似此熟練人員若因細過微瑕即行叅革則接任之員

初辦軍務未免生疎或至遲誤嗣後陝甘地方辦理軍需之州縣官員若無大過其所犯情有可原者著該督撫揆情度理量加寬宥若錢糧微有不清而事屬因公者統俟大軍凱旋之後查核明白以定功過


雍正十二年甲寅七月丁丑

上諭吏部凡命往各省人員多係不應即選之人該督撫等自應先行差委試看果有勞績再令署印署印果優然後題補或該省懸缺需人一到即行委署更當留心

訪察必實有政績可考方行題請實授嗣後題請實授者著將實在政績一一敘入本中題奏如果係卓越之才即不滿年限亦可聲明題請



大清世宗敬天昌運建中表正文武英明寬仁信毅大孝
至誠憲皇帝聖訓卷十三



總校官庶吉士臣張能照

校對官編修臣周厚輦

謄錄監生臣李維翰

欽定四庫全書叢要

史部

世宗憲皇帝聖訓卷十四至十六

詳校官編修臣繆晉

欽定四庫全書薈要卷七千八百四十六

史部

大清世宗敬天昌運建中表正文武英明寬仁信毅大孝
至誠憲皇帝聖訓卷十四

恤臣下

康熙六十一年壬寅十二月戊午

上諭吏部兵部王大臣等驗看革退人員內其武職官曾
在軍旅効力身經受傷雖年齒衰邁仍留職銜文職官
除年老庸劣外若由進士舉人正途出身初選知縣即



以才力不及革退亦屬可憫嗣後將此等人員或改授教職或以原品休致著會同酌議定例遵行

雍正元年癸卯五月甲申

上諭直隸巡撫李維鈞據奏直隸虧空請計州縣官歲入所餘積累填補州縣官令少從容不慮窘乏方可責其盡心撫字少有餘貲亦可自為地方興利之舉何可勒令為他人補苴虧缺耶

十一月癸卯兵部以考選軍政具奏

上諭曰此係初次考選爾等秉公考驗內有出兵効力行走
年老俸深者諸事尚能坐理仍著留任再人雖年老衰
頹不宜留任而出兵効力之處甚多將伊即行革退致
令無以度日深屬可憫應另行分晰具奏朕自加恩其雖
無効力行間之處而供職年久者伊等身逢太平之世
何由經歷戰陣爾等亦宜留心驗看

十二月甲子

上諭兵部國家保障封疆惟武臣是賴叅將以上責任尤

重其年老有疾不能辦理以致營務廢弛者自難姑容
但其間或有久歷戎行曾著勞績者情亦可憫嗣後叅
將以上有老病之員該督撫提鎮照例題叅仍將伊從
前行間効力之處查明繕摺夾入本章內同送內閣奏
聞朕酌加恩典以示篤念舊勞之意

雍正三年乙巳九月丁酉

上諭戶部朕體恤臣工時深軫念每思經理區畫以贍其
俯仰之資查舊例在京大小漢官每年俸米俱支給十

二石蓋因向日漢官攜帶家口者少食指無多故給米十二石即可粗足今見漢官帶家口者多若俸米仍照舊數則日用或有不敷難免內顧之慮嗣後在京大小漢官著按俸銀數目給與俸米俾祿糈所頒足供養贍以示朕加惠羣臣之至意

雍正四年丙午二月壬午

上諭大學士等朱軾奏請解任開缺以終服制情詞迫切此乃伊名節所關朕知其出於至性誠懇允從所請解

任開缺以全其志但三年為時甚久卸事閒居在籍伊心亦未必自安況目前現有畿輔水利之事正資料理可於八月起身前來居住京師以備委任顧問不居現任之職則與家居無異於禮既盡於心亦可安矣朱軾素性誠篤今遭母喪深恐其哀毀過節爾等可將朕意諄切諭之伊年高體弱不宜過於悲戚况六十不毀載在禮經若能仰體朕心時思朕訓護惜此身為國家出力伊母有知亦必深慰斯為忠孝兩全倘過哀以致毀瘠則有

負朕恩矣爾等竝傳諭膳房侍衛永壽攜茶飯往賜

雍正五年丁未三月癸巳

上諭八旗都統等兵丁等喜喪之事俱已加恩賞給銀兩
朕思大臣官員內有家貲饒裕者亦有家計艱窘者其
於喜事尚可若遇喪事倉卒之間必致窘迫無措嗣後
大臣官員內若遇喪事有情願借銀者著戶部借給四
個月俸祿至下季扣除若於未及扣除之前有緣事革
職者除世襲官員外仍令其賠補如病故者著即賞給

免令賠補其行取戶部庫銀恐一時不能即得先將旗
下恩賞兵丁銀兩給與再行取戶部庫銀墊補

十一月丁卯

上諭兵部本營兵丁不得拔補本營千把前經高其倬奏
請部議准行數年以來朕留心體訪始知將此處兵丁
用為他處千把頗多未便蓋兵丁平日所管汛地其情
形險阻素所深知及用為千把諸事有駕輕就熟之益
若用往他處則初到之時一切茫然必待學習而後通

曉此辦理公事之當籌及者也至於微員未弁安土重遷盤費居址措置匪易若令調換至數百里外必至拮据艱難有室家之累此又私情之當籌及者也朕思本營兵丁即為本營千把誠不能免於牽制瞻徇若於同城之中互相更換如係左營則用為右營前營則用為後營又如撫標鎮標之同城者亦可彼此更換庶於公私兩便其地方止有一營者或應於就近調補或應仍照從前舊例著該部定議具奏

雍正六年戊申二月庚戌

上諭內閣吏戶兵刑工五部堂官今皆各殫厥職贊襄政
治共相黽勉矢勤矢慎端方自持剔除情弊杜絕請託
甚屬可嘉朕深許之夫大臣果廉潔自守其用度必稍
不敷朕因國家政事資藉大臣之力而使之分心家計
朕心不忍五部大臣內除差往外省署印之人外俸銀
俸米著加倍給與其署理之大臣亦照此賞給若遇罰
俸案件將朕分外所給之俸不必入議

十一月乙亥

上諭戶部滇省邊鎮諸臣用度不敷朕深為軫念著將報明公件餘剩銀一萬三千兩全行賞給提鎮等官以為養廉若有贏餘令該提鎮酌為營伍公事之用以副朕眷念邊鎮之至意

雍正七年己酉正月庚戌

上諭吏部臺灣地方遠隔重洋全在道府廳縣各得其人而該員又須熟悉風土情形殫心辦理於地方始有裨

益向例文官俱以三年為滿後經原任總督滿保條奏將三年任滿之員加銜再留三年所以慎重海疆俾諳練之人久於其任也今據總督高其倬摺奏臺員以六年為滿而調任之時渡海而往即須數月任滿之後候缺挨陞以及交盤渡海又或一二年不等是前後合計須八九年且臺灣之例不帶家口其父母妻子隔越海洋未免有所牽掛應否請以四年為滿等語朕思臺灣道府廳縣等官自宜選用熟習諳練者然定期六年為

滿又加以候缺交盤渡海之期實為太久今再四思維
臺灣文員自到任之日為始將滿一年之期著該督撫
於閩省內地官員內揀選賢能之員乘冬月北風之時
令其到臺新舊協同辦理半年之內大約可以熟悉地
方情形則令舊員乘夏月南風之時回至內地補用將
來接任之員俱照此更換該員到臺協辦之時俱一體
算俸并給與俸銀及養廉之項如此則該員在臺前後
不過二年為期甚近而更換之員先往協辦又可習練

地方事宜似有裨益其道府大員作何請旨揀選同知以下等官作何銓選調補及量加議叙之處該部詳悉妥議具奏

三月甲戌

上諭內閣在京官員歷俸六年准其告假省親此乃通行之常例為伊等父母居家無事願歸定省者而言若其父母身患疾病或年過七十精力衰憊為子者迫欲回家侍奉以伸其孝養之忱則非可以年例拘也嗣後在

京官員有聞其父母患病急欲省覲或父母年逾七十而衰憊者俱不必俟六年俸滿著取具同鄉官印結於本衙門堂官處具呈該堂官查明啟奏請旨給假速回本籍不必由吏部彙題其歷俸六年告假省親者仍由吏部題奏將此永著為例

九月辛巳

上諭戶部外任大小官員罰俸之例如罰俸一年者則將本年應領俸銀扣抵若再有罰俸之案則勒限一年追

出俸銀解部如一年不完又罰俸一年展轉增加常有因一二年罰俸而積至數年或數十年者此例不甚妥協在罰俸多案之州縣與力薄難完之微員深為可憫著該部通行各省凡有此等罰俸之員倘力不能完即將伊任內應得之俸逐年扣抵不必勒限追繳又定例凡有休致革職病故之官員其應追罰俸銀兩俱行豁免惟江南等省有休革等事只將虛俸豁免其在罰俸以前食過之俸仍行追出直省例不畫一今著將休致病故

官員食過之俸槩行免追其革職之員則追其食過之俸以示懲儆直省一體遵行

十二月戊申

上諭內閣康熙五十九年陝省解送駝馬進藏文武官五十員每員借支肅州公庫銀五百兩為行裝路費之資本係應給之項因當時該督撫未經題報不敢作正項開銷是以各員回陝之時仍於各名下著追補項至今尚有未完銀一萬六千八百兩朕念伊等効力戎行遠

涉藏地雖非衝鋒破敵者比而間闕行役亦屬可憫著
將未完銀兩槩行豁免其已完者悉給還本員或交伊
之的屬如該員有別項虧欠應追者即准其抵補以示
優恤勞役之至意

雍正八年庚戌三月戊寅

上諭內閣各省駐防官員嗣後有効力年久因老辭職者
著該將軍等將伊食俸披甲之年及在行間効力之處
聲明咨送兵部奏聞候朕閱看其應加恩者照在京旗

員例加以恩施

庚寅

上諭吏部查例載官員失察衙役犯贓十兩以上者革職
朕思胥役衆多一官之耳目難於周遍倘知而故縱自
當從重處分若但失於覺察即將本官罷黜則賢員因
此誣誤者不少矣情有可原而處分太重轉易滋隱匿
之弊此應加通變者該部其悉心詳酌另行定例具奏

七月癸酉

上諭兵部舊例武弁給與親丁名糧以為養贍僕從家口之需前朕聞弁員等離任時即將隨丁名糧召募補足而接任之員陸續候缺每至數載不得養贍之資甚為艱窘已特降諭旨嗣後武弁去任者將所有名糧不必募補留與接任之員俾其得需餘潤此無非體恤貧員給與養廉以免扣剋虛冒苦累兵丁之弊也近聞武弁等若有陞遷事故者於該員離任之日即將隨丁名糧按數開除其住支銀米歸作截曠項下彙報充餉俟新

任之員到日方許申報起支朕思署事之員不無往來車馬食用之費且各營署事多係部發候補試用之人竝無俸薪等項應為籌畫養贍之道嗣後武弁去任之時其親丁名糧照舊存留不必歸入截曠項下其署事之員若係候補試用者准其全行支給以作養廉若係現任之員兼理者准其支給一半將一半留在本營以為修葺衙署添補器用之費即交該營守備存貯如有動用之處每季造冊申報該上司查核著各直省一體

遵行

九月丁卯

上諭內閣昨因京師地震凡兵民等屋宇傾圯者已降旨
詳查賞給銀兩以為修理之費而滿漢大小官員等亦
俱有修垣葺屋之事朕心軫念著將各部院衙門官員
八旗都統副都統統領叅領佐領驍騎校護軍校等以
及上衙門之世襲官上三旗侍衛內務府官員步軍統
領衙門等官巡捕三營官弁每人賞給半年之俸

十月壬子

上諭內閣向因大興宛平二縣近在輦轂之下常有速辦之公事不得不那移庫銀以濟用而上司察知每以虧空題叅至於罷黜治罪實為可憫用沛特恩於大宛二縣各發庫銀一萬兩存貯該縣倘遇有速辦之公事准其詳明府尹動支應用此朕體恤有司之至意也近思辦理軍需之州縣其急切應付之處不容刻緩而該州縣竝無存貯備用之項若擅動公帑又干嚴譴有司實

處兩難不可不為籌及朕意欲於辦理軍需及事務繁劇之州縣亦做大宛之例酌留帑銀以備急切公事之用其如何舉行俾辦公有賴而弊竇不生著大學士會同大將軍岳鍾琪總督高其倬悉心定議具奏

雍正十年壬子六月戊辰

上諭辦理軍機大臣等前派往西北兩路出征之滿洲蒙古漢軍大臣官員等於起程之時朕令寬裕給與跟隨人數其家中隨甲銀米仍留為該員家口養贍之資竝

未令其裁革項聞戶部於本年三月間行文各處以各員在外既有隨甲則家中不應重領銀米將各員隨甲銀米停其支領且自雍正七年大兵起程之日為始凡家中領過銀米於本人應領俸銀俸米之內照數坐扣還項該部因慎重錢糧之意竝未請旨遽爾通行甚屬錯謬殊非朕體恤出征人員之本意今特頒諭旨凡軍前之大臣官員等家中已領之隨甲銀米不必扣還其應領之項照常給與竝將此旨通行各處軍營知之

雍正十一年癸丑七月戊戌

上諭內閣據倉場總督兆華疏報六月二十二三等日雨水連綿河流驟漲天津一帶糧船多有浸濕漂損等語今年伏雨稍多河流驟漲以致損壞漕船尚非運官旗丁疎忽之咎其漂失米石免其賠補損壞船隻亦免賠修運官亦不必議處此朕體恤寬大之恩倘將來運官旗丁等因此番寬典不知加意隄防或有捏報巧飾等弊一經察出按律治罪

大清世宗敬天昌運建中表正文武英明寬仁信毅大孝
至誠憲皇帝聖訓卷十四

欽定四庫全書舊要卷七千八百四十七

史部

大清世宗敬天昌運建中表正文武英明寬仁信毅大孝
至誠憲皇帝聖訓卷十五

愛民一

雍正元年癸卯正月壬午

上諭戶部恩賜老人原為崇年尚齒而地方賞老人者每
州縣動支數千金司府牧令上下通同侵扣吏役復任
意需索老人十不得一上負曠典罪不容逭今飭令督

撫嚴查務令有司親自沿鄉訪察據實造冊給發不許
絲毫侵扣倘仍蹈前弊立即叅處如督撫奉行不謹朕
若訪出必加以失察之罪再老人九十以上者州縣不
時存問其或鰥寡無子及子孫貧不能養贍者督撫以
至州縣公同設法卹養或奏聞動用錢糧務令得需實
惠

壬辰

上諭署直隸巡撫趙之垣河南巡撫楊宗義朝廷設官置

吏原以養民遇有災荒即多方撫恤方不負委任之重
今據山東巡撫黃炳奏稱直隸河南鄰境小民資生無
策間有攜家就近覓食者朕覽奏惻然當此春初農事方
興若任其流離則小民何所依歸著即遴選賢員招輯
復業核實賑濟務令得所勿失農時以副朕惠養元元
之至意

乙未

上諭九卿朕受

皇考付託之重撫育羣黎夙夜孜孜惟恐閭閻失所昨山

東巡撫黃炳奏稱東兗二屬上年二麥失收小民未免
困苦直隸河南鄰境之民有攜家覓食者朕即飭諭直
隸河南巡撫加意撫綏招輯復業但兩省巡撫竝未奏
聞朕恐其視為泛常奉行不力爾等可會同確議或特
遣大臣或交與該撫作何賑濟安輯之法務使窮黎得
霑實惠又前歲河南黃水潰決汎溢於直隸地方比年
以來兩省近水居民耕種無資衣食匱乏均應加恩撫

恤爾等一併議奏

庚戌

上諭山東巡撫黃炳運道淺阻舊例撥派民夫挑淺濟運
朕思東省連年薄收百姓困苦未必堪此重役將來流
亡日多民生日蹙深為可憫古人救荒之策有大興役
以濟民食者不若竟動正項錢糧僱募民夫給以工食
挑濬運河則應僱既多散者復聚民資工食稍延殘喘
民心鼓舞工程易就運道早通於興役之中即寓賑濟

之意莫便於此已有旨命佟吉圖署理按察使速赴河
南與總河齊蘇勒商定回任料理運道俟其到日爾可
與公同竭力料理務使小民得霑實惠

五月戊戌

上諭戶部山東連年荒旱百姓艱食朕夙夜焦勞已諭巡
撫多方賑濟近聞兗州等處雨未霑足誠恐小民乏食
無以為生現今糧艘未入閘河可乘此時截留漕米以
備賑卹爾部酌議截留米石數目及分貯何府州縣作

速具奏

是日

上諭大學士等山西平定州等處山多田少粒食恒艱小民向賴陶冶器具輸運直省易米以供朝夕近聞直隸州縣因米貴禁糶此方百姓何以仰給昔春秋時諸侯各君其國尚申過糶之禁今天下一家海內之民皆吾赤子自宜緩急共濟現今陝西督臣運米萬石賑救山西甚愜朕意豈有坐視鄰封乏食反行過糶之理自今

凡鄰近郡邑偶遇荒歉即相拯卹毋得各分疆界漠不
相關其所當禁者富戶規利販米動盈十萬又沿海數
省運米出洋玩法網利該督撫提鎮當嚴查禁止至肩
負小民貿易度日悉從自便可也著直隸巡撫曉諭鄰
近平定州等處州縣不得禁糴以副朕一視同仁之意
并諭直省各督撫知之

十月壬申

上諭戶部朕御極以來宵衣旰食無日不以民依為念督

撫以下守令以上凡有地方之責者均宜公忠體國仰
副朕心今年夏月朕以北省二麥歉收差員到南省於
秋成後採買米石以備賑貸平糶朕意切於為民正欲
酌盈劑虛以羨補不足也又恐有不便於民之處於差
員臨行之時再三申諭地方米多方可採買不必定要
買足今聞各省地方官因欽差買米禁止商販不許出
境大負朕恫瘝一體之意甚屬不合況浙江及江南蘇
松等府地窄人稠即豐收之年亦皆仰食於湖廣江西

等處今秋成歉收若商販不通必致米價騰貴該部速即行文各省總督巡撫凡有米商出境任便放行使湖廣江西安慶等處米船直抵蘇州蘇州米船直抵浙江毋得阻撓庶幾有無流通民皆足食以副朕愛養元元之意

十一月丁亥

上諭戶部浙省偶值秋旱被災地方已經蠲免錢糧令有司加意撫綏舊額杭嘉湖所屬十四州縣應徵漕米三

十二萬石今荒歉之歲民間納米為艱著令徵收一半
改折一半既可以濟民之食又可以抒民之力其改折
之價著照康熙九年例每石折銀一兩完交其應徵漕
米十六萬米色或未能純一著令紅白兼收以示朕軫
恤地方格外施仁之至意

雍正二年甲辰五月辛酉

上諭四川陝西湖廣廣東廣西雲南貴州督撫提鎮等朕
聞各處土司鮮知法紀每於所屬土民多端科派較之

有司徵收正供不啻倍蓰甚至取其馬牛奪其子女生殺任情土民受其魚肉敢怒而不敢言孰非朕之赤子方今天下共享樂利而土民獨使向隅朕心深為不忍然土司之敢於恣肆者大率皆由漢姦指使或緣事犯法避罪藏身或積惡生姦依勢橫行此輩粗知文義為之主文辦事助虐逞強無所不至誠可痛恨嗣後督撫提鎮宜嚴飭所屬土官愛恤土民毋得肆為殘暴毋得濫行科派儻申飭之後不改前非一經發覺土司叅革

從重究擬漢姦立置重典切勿姑容寬縱以副朕子惠
元元遐邇一體之至意

六月庚子

上諭江西巡撫裴率度地丁錢糧百姓自行投納此定例
也聞江西省用里民催收每里十甲輪遞值年名曰里
長催頭小民充者有經催之責既不免姦胥之需索而
經年奔走曠農失業擾民實甚須即查明通行裁革若
慮裁革里長輸納不前亦當另設催徵之法或止令十

里輪催花戶各自完納庶為近便務須斟酌盡善無滋民累以廣朕惠愛元元之意

九月辛酉

上諭江南浙江總督巡撫等今歲七月中颶風大作海潮泛溢江南浙江沿海州縣衛所堤岸多被衝塌居民田廬漂沒朕軫念深切已降諭旨令江浙地方官亟行賑濟撫綏毋使災黎失所今被衝海塘若不及時修築恐鹹水灌入內河有礙耕種爾督撫等著即查明各處損

壞塘工料估價值動正項錢糧作速興工至沿海失業居民度日艱難藉此傭役俾日得工價以資餬口是拯救窮民之法即寓其中矣將此再行飭諭務期實心遵旨速行以副朕憂恤元元至意

壬戌

上諭湖廣江西河南山東安徽督撫等今歲各省秋成大
有惟浙江江南沿海地方七月十八九等日海潮泛溢
近海田禾不無損壞朕軫念災黎惟恐失所業經嚴飭

各省督撫發倉賑濟但蘇松杭嘉等府人稠地狹產米無多雖豐年亦仰給於湖廣江西及就近鄰省今沿海被災恐將來米價騰貴小民艱食湖廣江西地居上流河南山東二省接壤江南今歲俱各豐收安徽寧太等府屬亦俱收成豐稔著動湖廣藩庫銀買米十萬石江西藩庫銀買米六萬石運交浙江巡撫平糶動河南藩庫銀買米四萬石山東藩庫銀買米六萬石安慶藩庫銀買米五萬石運交蘇州巡撫平糶俱著速即辦理委

員運送毋得怠緩遲誤

雍正三年乙巳七月辛酉

上諭直隸總督山東河南巡撫今歲夏秋以來直隸山東河南三省雨水過多小民謀生無術者有之朕心甚為憫惻茲秋成將屆憂念彌深該督撫可速委能員實心詳察其有生計蕭條升斗無資以及田地被淹房廬倒塌者即一面賑恤一面具奏務使窮幽極僻之區亦不至一夫失所至所遣官吏或有草率將事及隱匿不聞

甚至捏報賑給侵漁朦混使澤不下究者察出將該管官一併從重治罪斷不姑恕爾督撫等尤宜實心誠求竭力料理如恤子孫如辦家事勿視為具文以副朕宵旰憂勞之至意

八月癸未

上諭大學士九卿等今年夏秋直隸地方雨水過多恐秋禾歉收窮民乏食已降諭旨令該地方官詳察賑濟朕早夜思維深切軫念若於賑濟之外有城工應修理者

即行修理俾窮民傭工藉以養贍更為有益著於六部
中選擇司官六員編檢庶常內選擇四員御史內選擇
二員中書內選擇一員俱在漢官中擇其為人老實謹
慎可用者帶采引見候朕指示修理城工地方令其前
往再連歲口外收成頗好朕曾降旨進口糴賣米糧不
得禁止近聞各口官弁於米糧進口之時每借稽察為
名多方勒索以致阻滯著兵部行文各口毋得仍蹈前
轍使米糧不得通行

十二月戊子

上諭內閣山東歷城等四十三州縣德州等五衛所今歲被水收成歉薄巡撫陳世倌奏請將被災之州縣衛所應徵漕糧盡行緩徵分作三年帶徵起運經部議覆以漕糧無本年全緩分作三年帶徵之例應緩徵一半於雍正四年秋成後徵收起運等語朕思被災地方有輕重不等若被災既重即徵收漕米一半閭閻亦覺艱難著山東巡撫於四十三州縣五衛所之中悉心詳查其

被災稍輕之處仍照部議緩徵一半被災重者准其全緩務期分別確當不得草率偏枯倘輕重失實日後發覺定行重治其罪

雍正四年丙午二月庚午

上諭大學士等去年近京地方雨水稍多收成歉薄窮民乏食朕心軫念即令蠲免錢糧發通倉米四五十萬石徧行賑濟又念失業之民覓食來京者多故於五城飯廠兩次加添米石又於五門增設飯廠五處俾窮民得

以養給但目前雖逐日散賑究非長策春氣漸暖正宜播種此等窮民不得早還故土必致有誤春耕應如何設法資送或由陸路或由水路俾得各回原籍復其本業

戊寅

上諭戶部去秋北方多雨直隸所屬七十四州縣被水歉收朕心深為軫恤疊沛恩澤加惠窮黎已將七十四州縣被災田畝之錢糧照例蠲免其餘應徵額賦又復停

徵在案朕思一省之中既有七十餘州縣收成歉薄則
必有向鄰封隔縣謀生覓食之民當此青黃不接之時
閭閻豈能充裕若仍照舊徵收民力輸將未免竭蹶用
是特頒諭旨施恩於常格之外將雍正四年通省應徵
額賦一體停徵俾民力寬紓各得用力於南畝以副朕
勤恤民隱之至意爾部即遵諭行

庚寅

上諭戶部朕軫念東省被水窮黎粒食維艱特允山東巡

撫陳世倌之請於大清河興工疏濬令乏食小民得力役之資為糊口之計今天氣和暖土脉鬆潤正施畚鍤之時去秋該撫奏請設廠煮賑目下赴工者衆粥廠可以停止但念此就食小民其中豈無老弱殘疾不能赴工者煮賑既停麥秋之期尚遠此輩窮無所歸之民或仍至失所朕心深為惻然應行文山東巡撫陳世倌將不能赴工之窮民查明若干每日仍給與升合之資俟至麥收後停止所用銀兩俱作正項開銷該撫嚴飭各州

縣官務期實心奉行以副朕養育百姓之至意爾部速遵諭行

是日

上諭戶部山東去年被水州縣其應輸漕米朕於部覆緩半之外敕令該撫查被災尤甚之處將漕項悉行緩徵但念各州縣應給兵糧例不在緩徵之內軍糈固為緊要而被災黎庶於粒食之餘責其輸納糧米未免艱於措辦爾部行文山東巡撫陳世倌著於起運雍正三年

漕米內截留五千石以為支給兵糧之用倘有餘剩即留為下年兵米其支給米石俟秋收後徵補還項爾部速遵諭行

三月甲辰

上諭大學士等去歲畿南被水深軫朕懷雖截漕發粟賑糶頻施然猶恐小民甫經災沴之後無力供輸是以又特降旨將雍正四年通省錢糧俱令緩徵夫今年錢糧尚且緩徵則從前未完之項豈有轉行急徵之理今聞

地方官竟有仍追比前欠者漠視民瘼莫此為甚深負
朕憂念斯民之至意著傳旨與直隸總督速飭各地方
官凡舊欠錢糧一槩緩徵所有兵餉工料各項需用之
處俱動藩庫銀兩撥給不得短少扣剋如地方官仍有私
徵等弊一經察出定行從重治罪

五月庚申

上諭都察院聞京城近日米價騰貴恐有姦人囤積射利
因天氣連陰借此擾亂著都察院轉飭五城曉諭各行

戶不得過高價值勒索小民儻有囤積遏糴不遵勸諭者該城御史密行察訪從重治罪將京倉好米發五萬石分給五城每城領米一萬石照例立廠委員平糴俟市價平減即行停止其未糴之米即存貯該城將來或市價復昂即將此米平糴若此米用完仍需平糴著都察院再行請旨

雍正五年丁未十二月辛丑署兩江總督范時繹奏江南太倉州鎮洋縣境內劉河鉅工已蒙發帑

開濬七浦一河該地士民情願自行開濬候

旨遵行

上諭內閣君民原屬一體民間之生計即國計也儻遇國用不敷之時勢不得不資藉於民力今國用充足朕為地方籌畫萬年之利不惜多費帑金興修鉅工養育萬姓若仍用民力以辦公事非朕本心也況小民効力工程或致荒其本業而又不免官吏之督催煩擾朕心實為不忍著仍動公帑辦理竝將朕旨遍行曉諭該州縣

士民伊等當體朕愛養元元之心於工程告成之後加
意照看歲歲疏濬防護俾地方永受其益則勝於目前
之趨事赴功多矣

雍正六年戊申二月甲辰

上諭內閣上年聞湖廣廣東江西等省之民因本地歉收
米貴相率而遷移四川者不下數萬人已令四川督撫
設法安插毋使失所但思上年江西收成頗好即湖廣
廣東亦非歉歲不過近水之地畧被淹損何至居民輕

去其鄉者如此之衆也因時時留心體察今據各省陸續奏聞大約因川省曠土本寬米多價賤而無知之民平日既懷趨利之見又有傳說者謂川省之米三錢可買一石又有一種包攬棍徒極言川省易於度日一去入籍便可富饒愚民被其煽惑不獨貧者墮其術中即有業者亦鬻產以圖富足獨不思川省食物價賤之故皆因地廣人稀食用者少是以如此若遠近之人雲集一省則食之者衆求如從前之賤價豈可得乎況彼此

相隔或至千里或數千里小民離棄鄉井扶老挈幼跋涉山川安有餘資以供路費中途困阨求救無門不相率而為匪類勢必為溝中之瘠矣豈非輕舉妄動自貽伊戚乎草野識見庸愚必須訓示方能醒悟為地方官者當撫綏之於平日而勸教之於臨時開其愚蒙卹其窮困時勤訓導使百姓知故土之可戀轉徙之非宜則愚民之不醒悟者亦少矣且各省皆有可墾之田土而所以任其廢棄者其故有二一則民俗好為爭競當其

未懇之時則置之不問及至既懇之後則羣起相爭是以將可耕之壤拋為曠土甚為可惜一則墾田必須工本而寒苦之民不能措辦以致委諸草莽為有司者誠能經其疆界以息爭端助其籽種以資耕作寬其陞科之年優其上農之賞則百姓斷無有不踴躍鼓舞趨事赴功者矣朕宵旰勤勞無刻不以百姓生計為念茲頒諭旨竝非禁百姓之謀食於他方也祇以愚民無知圖利心切惑於邪說見異而遷遂輕舍故鄉甘受流離之苦

朕心實為不忍夫在彼在此皆吾赤子若本籍果逢歉歲難以資生該地方有司仰體朕心即時奏聞朕必沛以恩膏使之得所何必分散他方以冀不可必得之利著各督撫曉諭官民等知之

三月壬子湖廣總督邁柱奏各屬堤塍向係按糧派夫歲修今各業戶感

恩情願加高修築其支河淤塞之處業戶亦自行挑濬上諭內閣修築江堤疏濬河道該地方既有歲修之定例

今百姓踴躍從事加工修濬甚屬可嘉用沛特恩助其
力作查康熙五十五年湖北湖南地方興修堤岸河道
工程蒙

聖祖仁皇帝特恩賞助米糧人工之費共計銀六萬兩今
朕遵照此例將帑銀賞賜六萬兩令邁柱於湖北湖南
二省酌量工程多寡分派散給竝飭地方有司實心料
理使小民均沾實惠工程永遠堅固以副朕愛養楚民
之至意

八月乙酉

上諭湖廣督撫等桑植土司向國棟保靖土司彭御彬暴虐不仁動輒殺戮且骨肉相殘土民如在水火朕聞之深加憫惻既有被害男婦紛紛來歸情願編入版籍以免殘虐若拒而不納則結怨之土民必至無遺類矣朕撫有四海內地苗疆皆朕版圖漢土民人皆朕赤子偶有一夫不獲皆塵朕懷况數千里土民安忍置之度外今俯順輿情俱准改土為流設官綏輯彈壓其應行審

理之舊案著該督撫一併審結但帶兵入內官弁等須
仰體朕心不得殺戮無辜竝曉諭平日奉法之土司仍
各安居樂業不必疑懼其土民向被桑植保靖二土司
殘虐者著加意撫恤去其苛政務使出水火而登衽席
以副朕除暴安民之意如有助惡黨與即行剪除儻歸
誠嚮化皆從寬釋其向國棟彭御彬應安插何省不令
失所之處著該督撫酌量定議以廣朕法外之仁仍將
此曉諭附近土司咸使悉知朕意

十月辛巳

上諭戶部向來江浙收兌漕糧俱用本地粳米擇其乾圓潔淨者方准交納遇收成稍薄之年該督撫每以紅白兼收為請朕皆允行夫米糧乾潔皆可久貯原不在色之紅白江浙二省戶口繁多每年應納漕糧將及四百萬石若必拘定本地粳米恐米價昂貴民間難於輸將嗣後江浙徵收漕米但擇乾圓潔淨不必較論米色准令紅白兼收舛粳竝納著為例

大清世宗敬天昌運建中表正文武英明寬仁信毅大孝
至誠憲皇帝聖訓卷十五